

MALAYSIA
DEWAN RAKYAT
ATURAN URUSAN MESYUARAT

NASKHAH SAHIH/BAHASA MALAYSIA

<http://www.parlimen.gov.my>

HARI SELASA, 20 OKTOBER 2015, PUKUL 10.00 PAGI

Bil. 38

PERTANYAAN-PERTANYAAN BAGI JAWAB LISAN

1. PR-1333-L69831
Dr. Noor Azmi bin Ghazali [Bagan Serai] minta **MENTERI PERDAGANGAN ANTARABANGSA DAN INDUSTRI** menyatakan bagaimana Malaysia mampu dapat memanfaatkan AEC dan juga perjanjian yang mungkin kita meterai iaitu TPPA dan apakah langkah-langkah yang telah diambil bagi memastikan integrasi ekonomi ini memberi manfaat bersih untuk Malaysia.
2. PR-1333-L70885
Tuan Loke Siew Fook [Seremban] minta **MENTERI PELANCONGAN DAN KEBUDAYAAN** menyatakan langkah-langkah spesifik yang telah dan akan diambil oleh pihak Kementerian untuk menarik lebih ramai pelancong ke Malaysia khususnya pasaran negara China dan sejauh mana pencapaian KPI dalam kehadiran pelancong asing untuk tahun 2015.
3. PR-1333-L70306
Tuan Che Mohamad Zulkifly bin Jusoh [Setiu] minta **MENTERI PENDIDIKAN** menyatakan mengenai status kualiti pendidikan negara menjelang berakhirnya gelombang pertama Pelan Pembangunan Pendidikan Malaysia (PPPM) pada tahun 2015.
4. PR-1333-L71403
Dato' Seri Abdul Hadi bin Awang [Marang] minta **MENTERI LUAR NEGERI** menyatakan apakah pendirian dan langkah yang diambil oleh Kerajaan untuk membantu pelarian Rohingya di Malaysia dan rakyat Rohingya di Arakan.
5. PR-1333-L69877
Datuk Dr. Makin @ Marcus Mojigoh [Putatan] minta **MENTERI KEWANGAN** menyatakan :-
 - (a) usaha-usaha yang telah diambil oleh Kerajaan untuk menstabilkan serta mengukuhkan nilai Ringgit Malaysia; dan
 - (b) usaha-usaha Kerajaan untuk menjelaskan kepada rakyat mengenai dengan isu kemerosotan ekonomi negara pada ketika ini.

6. PR-1333-L71074
Tuan V. Sivakumar [Batu Gajah] minta **MENTERI KESIHATAN** menyatakan sama ada Kerajaan bercadang untuk menambahkan bilangan ambulans di Hospital Batu Gajah memandangkan keperluannya semakin meningkat bagi menghadapi kecemasan yang kerap berlaku di kawasan ini.
7. PR-1333-L69506
Dato' Wira Othman bin Abdul [Pendang] minta **MENTERI KEMAJUAN LUAR BANDAR DAN WILAYAH** menyatakan apakah hasil perbincangan Jawatan Kuasa Kabinet mengenai harga getah. Adakah Kementerian bercadang untuk memberikan sara hidup bulanan kepada penoreh getah.
8. PR-1333-L71527
Puan Hajah Fuziah binti Salleh [Kuantan] minta **MENTERI SUMBER ASLI DAN ALAM SEKITAR** menyatakan :-
 - (a) senaraikan syarikat yang telah memperoleh lesen daripada Kementerian untuk mengeksport bauksit ke negara China dari Pelabuhan Kuantan; dan
 - (b) di atas dasar apakah lesen mengeksport bauksit ini dibenarkan oleh Kementerian.
9. PR-1333-L69685
Datuk Hajah Norah binti Abd Rahman [Tanjong Manis] minta **MENTERI BELIA DAN SUKAN** menyatakan adakah sukan air seperti "*water ski*" dan "*wake board*" akan dipromosi oleh Kementerian secara meluas di Malaysia memandangkan ia mampu melahirkan peserta yang mampu bersaing di peringkat antarabangsa dan juga sebagai prospek pingat dalam Sukan Olimpik Tokyo 2020.
10. PR-1333-L70707
Tuan Manivanan a/l Gowindasamy [Kapar] minta **MENTERI PERDAGANGAN DALAM NEGERI, KOPERASI DAN KEPENGUNAAN** menyatakan :-
 - (a) tindakan yang telah diambil oleh Suruhanjaya Syarikat Malaysia (SSM) terhadap mana-mana syarikat yang disyaki atau didakwa menjalankan kegiatan "*gores dan menang*", dan nyatakan tindakan yang telah diambil secara terperinci, jika ada; dan
 - (b) apakah langkah-langkah yang telah diambil oleh Kerajaan Pusat untuk memastikan harga barang sentiasa terkawal dan tidak meningkat setelah GST dilaksanakan sejak 1 April 2015.
11. PR-1333-L71379
Tan Sri Datuk Seri Panglima Annuar bin Musa [Ketereh] minta **MENTERI PERDAGANGAN ANTARABANGSA DAN INDUSTRI** menyatakan kesan eksport dan import negara akibat kejatuhan Ringgit yang melanda dan apakah strategi yang telah diambil bagi mengawal pasaran tersebut.

12. PR-1333-L70000
Tuan Haji Khalid bin Abdul Samad [Shah Alam] minta **PERDANA MENTERI** menyatakan pendirian Kerajaan terhadap semua insiden berbaur perkauman dan tindakan yang sedang dan bakal dilaksanakan.
13. PR-1333-L71320
Dato' Sri Hasan bin Malek [Kuala Pilah] minta **MENTERI PENDIDIKAN TINGGI** menyatakan apakah tindakan yang telah diambil bagi mengatasi masalah penglibatan pelajar kolej, universiti dan sekolah dalam aktiviti haram seperti pelacuran terutamanya di ibu kota Kuala Lumpur dan apakah langkah pengawalan bagi menyekat penularan aktiviti-aktiviti haram ini.
14. PR-1333-L70404
Puan Teresa Kok Suh Sim [Seputeh] minta **MENTERI KEMAJUAN LUAR BANDAR DAN WILAYAH** menyatakan sebab beliau mengarahkan MARA menghentikan tajaan pelajar Bumiputera ke Taylors University. Apakah arahan ini berkaitan dengan pihak Taylors University menghentikan kontrak dengan syarikat bas yang menghantar peserta ke Perhimpunan Baju Merah.
15. PR-1333-L70935
Dato' Abd. Aziz bin Haji Sheikh Fadzir [Kulim Bandar Baharu] minta **MENTERI KERJA RAYA** menyatakan apakah nasib pekerja-pekerja tol selepas pelaksanaan bayaran tol secara elektronik (ETC) dilaksanakan dan berapakah jumlah pekerja yang terlibat secara keseluruhannya
16. PR-1333-L71531
Dato' Takiyuddin bin Hassan [Kota Bharu] minta **MENTERI LUAR NEGERI** menyatakan sikap Kerajaan terhadap pelarian-pelarian yang terpaksa lari dari negara mereka yang bergolak terutamanya dari Timur Tengah.
17. PR-1333-L70730
Datuk Noor Ehsanuddin bin Mohd Harun Narrashid [Kota Tinggi] minta **MENTERI PERTAHANAN** menyatakan adakah Kementerian bercadang untuk memperkasakan serta menaik taraf kelengkapan *Primary* Radar bagi kawalan keselamatan udara Angkatan Tentera Malaysia.
18. PR-1333-L71501
Tuan Sim Tong Him [Kota Melaka] minta **PERDANA MENTERI** menyatakan tentang kedudukan " Gagasan Satu Malaysia " :-
 - (a) adakah ia masih "*relevant*" memandangkan kebelakangan ini kenyataan Perdana Menteri sendiri lebih mengutamakan satu kaum sahaja; dan
 - (b) sila buktikan bahawa rakyat berbilang kaum menjadi lebih rapat selepas pelaksanaan "Gagasan Satu Malaysia" ini. .

19. PR-1333-L70565
Datuk Bung Moktar bin Radin [Kinabatangan] minta **MENTERI PERDAGANGAN DALAM NEGERI, KOPERASI DAN KEPENGGUNAAN** menyatakan sejauh manakah kesungguhan pihak Kementerian dalam menyalurkan subsidi kepada golongan sasar dan apakah perancangan Kementerian dalam memastikan pasukan penguatkuasaan Kementerian terutamanya di negeri Sabah benar-benar efektif dalam mengelakkan ketirisan dalam program-program pemberian subsidi Kerajaan seperti "*Community Drumming*" dan bekalan barang-barang perlu.
20. PR-1333-L71038
Tuan Su Keong Siong [Ipoh Timor] minta **MENTERI LUAR NEGERI** menyatakan sumbangan dan pencapaian Malaysia sebagai anggota ahli Majlis Keselamatan Persatuan Bangsa-Bangsa Bersatu untuk tempoh 2015-2016. Apakah kedudukan Malaysia berkenaan ratifikasi Rome Statute (International Criminal Court Statute) dan Arms Trade Treaty yang telah lama tertunda.
21. PR-1333-L70639
Datuk Haji Datu Nasrun bin Datu Mansur [Silam] minta **MENTERI DALAM NEGERI** menyatakan melalui sistem Biometrik warga asing dan *Sistem Security Nasional Nexcode (NERS)* adakah sistem ini berupaya untuk memantau dan mengawal kemasukan warga asing di Malaysia khususnya Sabah.
22. PR-1333-L70329
Tuan Wong Chen [Kelana Jaya] minta **MENTERI DALAM NEGERI** menyatakan secara terperinci bilangan jenazah dan kubur-kubur besar pelarian Rohingya yang telah ditemui. Berapa ramaikah individu yang telah ditahan dan didakwa oleh Kementerian berkenaan dengan hal ini.
23. PR-1333-L71297
Datuk Wira Haji Ahmad bin Hamzah [Jasin] minta **PERDANA MENTERI** menyatakan nilai GNI per kapita kaum Bumiputera, Cina dan India pada tahun 2009, 2014 dan unjuran pada tahun 2020 nanti serta usaha-usaha konkrit untuk merapatkan jurang tersebut.
24. PR-1333-L70970
Dr. Ong Kian Ming [Serdang] minta **MENTERI DALAM NEGERI** menyatakan jumlah tahanan mengikut kewarganegaraan dan jantina di setiap pusat tahanan pendatang asing di negara ini.
25. PR-1333-L70034
Datuk Abd Rahim bin Bakri [Kudat] minta **MENTERI PELANCONGAN DAN KEBUDAYAAN** menyatakan jumlah kedatangan pelancong asing ke Negeri Sabah sehingga kini dan apakah langkah-langkah yang diambil untuk mempromosikan negeri Sabah sebagai destinasi utama pelancongan.

26. PR-1333-L69603
Dr. Michael Jeyakumar Devaraj [Sungai Siput] minta **MENTERI SUMBER MANUSIA** menyatakan mengapa doktor-doktor yang menganggotai Jemaah Doktor PERKESO di Kuala Kangsar pada 30 Julai 2015 tidak menanggungkan kes HUK Puan Saraswathy a/p Arumugam KP 801138-02-5944. Puan Saraswathy telah mengalami pembedahan "*refashioning of stump*" pada 29 Julai 2015 dan jelas belum mencapai MMI (*Maximum Medical Improvement*).
27. PR-1333-L69498
Dato' Sri Haji Abdul Azeez bin Abdul Rahim [Baling] minta **PERDANA MENTERI** menyatakan usaha Kementerian dalam menaik taraf sistem pengangkutan awam di kawasan Baling khususnya kerana perkhidmatan pengangkutan awam di kawasan ini masih di tahap minimum.
28. PR-1333-L71464
Tuan Sim Chee Keong [Bukit Mertajam] minta **MENTERI KEWANGAN** menyatakan jumlah GST yang dikutip sejak bulan April 2015 mengikut pecahan bulan, industri dan negeri. Nyatakan sama ada jumlah ini mengikut ramalan Kerajaan.
29. PR-1333-L69833
Tuan Lim Guan Eng [Bagan] minta **MENTERI KEWANGAN** menyatakan jumlah kutipan daripada 6% GST telah mengakibatkan penurunan '*volume*' perniagaan di negara sebanyak 30% serta menyusahkan kehidupan harian pekerja biasa yang tidak cukup wang belanja. Mengapakah GST tidak dihapuskan atau dikurangkan.
30. PR-1333-L69915
Puan Alice Lau Kiong Yieng [Lanang] minta **PERDANA MENTERI** menyatakan :
- (a) kesan Perhimpunan Merah "Melayu Bangkit" pada 16 September 2015 terhadap pelabur Cina atau pelabur dari China memandangkan perkataan tidak senonoh seperti "*cina babi*" dikeluarkan oleh penganjur dan peserta; dan
 - (b) apakah tindakan yang telah dan akan diambil kepada golongan tersebut yang telah menjejaskan keharmonian dan ketenteraman di negara Malaysia.
31. PR-1333-L69961
Dato' Seri Dr. Wan Azizah binti Wan Ismail [Permatang Pauh] minta **MENTERI LUAR NEGERI** menyatakan komitmen Malaysia bagi pembangunan semula Gaza di dalam Persidangan Kaherah mengenai Gaza 2014. Nyatakan jumlah sumbangannya kepada tabung pembangunan semula Gaza bagi tahun 2014, 2015 dan tahun-tahun seterusnya.
32. PR-1333-L69675
Datuk Juslie bin Ajirol [Libaran] minta **PERDANA MENTERI** menyatakan jumlah hotel bertaraf empat dan lima bintang di negara ini yang telah memperoleh pensijilan halal daripada Jabatan Kemajuan Islam Malaysia (JAKIM) bagi dapur utama dan restoran.

33. PR-1333-L71027
Tuan R. Sivarasa [Subang] minta **PERDANA MENTERI** menyatakan sama ada beliau telah dihubungi oleh wakil-wakil Kerajaan Amerika Syarikat berkaitan dengan siasatan "Grand Jury"• di sana dalam tuduhan-tuduhan amalan rasuah yang membabitkan Perdana Menteri sendiri dan dua orang lagi, Riza Aziz dan Jho Low; dan jawapan beliau sama ada tuduhan tersebut berasas atau tidak.
34. PR-1333-L70420
Tuan Lim Lip Eng [Segambut] minta **MENTERI DALAM NEGERI** menyatakan status tindakan mahkamah dan senarai nama peserta yang ditangkap dalam perhimpunan baju merah yang berlaku pada 16 September 2015. Adakah tujuan perhimpunan tersebut untuk menunjukkan manifestasi perasaan orang Melayu yang kini "*ditolak ke dinding*".
35. PR-1333-L69599
Laksamana Pertama Mohamad Imran bin Abd Hamid (B) [Lumut] minta **MENTERI PERTAHANAN** menyatakan apakah kuasa yang membolehkan RM5,000,000.00 disalurkan ke Tabung Kebajikan ATM untuk kegunaan apa dan apakah Akta yang membenarkannya.
36. PR-1333-L71157
Tuan Hee Loy Sian [Petaling Jaya Selatan] minta **PERDANA MENTERI** menyatakan :-
- (a) mengapa "Wang Derma" berjumlah RM2.6 bilion dimasukkan ke akaun persendirian Perdana Menteri bukan ke akaun parti; dan
 - (b) siapakah penderma tersebut dan tujuan wang ini didermakan.
37. PR-1333-L70483
Tuan Mohamed Hanipa bin Maidin [Sepang] minta **MENTERI PENGANGKUTAN** menyatakan :-
- (a) adakah Kerajaan telah menjalankan audit ke atas pembinaan dan kemajuan (*construction and development*) KLIA2 seperti yang dijanjikan Menteri Pengangkutan dan jika telah dimulakan audit tersebut, apakah status audit tersebut dan bilakah dijangka siap audit tersebut, jika belum mengapa; dan
 - (b) berapakah, setakat bulan September 2015, jumlah kos yang telah dibelanjakan oleh MAHB bagi membuat kerja-kerja pembaikan (*repairs*) kerosakan-kerosakan di KLIA2.
38. PR-1333-L70813
Tuan Julian Tan Kok Ping [Stampin] minta **MENTERI KEWANGAN** menyatakan jumlah pungutan GST di Sarawak semenjak ia dilaksanakan.

39. PR-1333-L70412

Puan Teresa Kok Suh Sim [Seputeh] minta **MENTERI KEMAJUAN LUAR BANDAR DAN WILAYAH** menyatakan jumlah yang dibayar oleh Mara Inc untuk membeli saham di Trushcross Land Holding Ltd. yang diperbadankan dalam BVI di Australia. Nyatakan peguam, akauntan dan penilai yang dilantik oleh pihak Mara dan Mara Inc. di Australia dan Malaysia untuk mengendalikan pembelian syarikat Trushcross Land Holding.

40. PR-1333-L69808

Dato' Haji Mahfuz bin Omar [Pokok Sena] minta **MENTERI DALAM NEGERI** menyatakan apakah hasil siasatan yang telah dilakukan terhadap dakwaan yang dibuat oleh Dato' Abdul Hamid Bador, bekas timbalan ketua cawangan khas Polis Diraja Malaysia yang menyatakan:-

- (a) ada pihak tertentu yang cuba menutup maklumat berkaitan serta menyembunyikan 3 saksi penting dalam siasatan kes 1MDB serta mengguna PDRM khususnya cawangan khas mencampuri dan diperalat untuk kepentingan politik pihak tertentu; dan
- (b) apakah tindakan yang diambil terhadap Dato' Abdul Hamid Bador jika dakwaan beliau itu tidak benar.

41. PR-1333-L70936

Tuan Ramkarpal Singh a/l Karpal Singh [Bukit Gelugor] minta **MENTERI SUMBER ASLI DAN ALAM SEKITAR** menyatakan sama ada usaha-usaha untuk mengelakkan berulangnya jerebu pada masa hadapan telah pun dipersetujui antara Kerajaan Malaysia, Indonesia dan Singapura. Sekiranya, nyatakan usaha-usaha tersebut.

42. PR-1333-L70273

Dato' Mohd Ariff Sabri bin Abdul Aziz [Raub] minta **MENTERI PENGANGKUTAN** menyatakan :-

- (a) sehingga 1 Mei 2015, berapakah hutang AirAsia dan Asia-X untuk *Passenger Service Charge (PSC)* dan lain-lain hutang seperti sewa, *landing fees* kepada MAHB; dan
- (b) semua syarikat penerbangan lain di Kota Kinabalu sudah beroperasi di Terminal 1 Kota Kinabalu International Airport dan AirAsia berjanji akan pindah menjelang 1 Ogos 2015. Mengapakah ia masih dibenarkan beroperasi di Terminal 2 yang ternyata sesak dan kekurangan kemudahan dan kenapakah Kementerian enggan menutup Terminal 2 kerana mengenakan kos yang tinggi untuk menyelenggara dua terminal dengan 2 kumpulan berasingan imigresen, kastam, keselamatan dan sebagainya.

43. PR-1333-L71031

Puan Teo Nie Ching [Kulai] minta **PERDANA MENTERI** menyatakan samada SRC International melalui Ihsan Perdana telah menderma RM42 juta kepada YAB Pekan dan sama ada GLC lain juga pernah menderma duit kepada beliau, jika ya, jumlah dermaan.

44. PR-1333-L71455
Tuan Fong Kui Lun [Bukit Bintang] minta **MENTERI KEWANGAN** menyatakan berikutan penurunan nilai mata wang Ringgit Malaysia berbanding mata wang asing, apakah langkah-langkah jangka pendek dan jangka panjang yang diambil oleh Malaysia bagi membendung penurunan RM lebih teruk untuk mengekalkan keyakinan para pelabur dan rakyat jelata sendiri dan sejauh mana langkah proaktif ekonomi boleh membantu.
45. PR-1333-L69636
Tuan Khoo Soo Seang [Tebrau] minta **MENTERI KESEJAHTERAAN BANDAR, PERUMAHAN DAN KERAJAAN TEMPATAN** menyatakan adakah peraturan untuk melarang binatang peliharaan dibawa masuk ke pusat-pusat membeli-belah, memandangkan kejadian membawa binatang peliharaan dengan troli bukan sahaja menyentuh sensitiviti agama bahkan mencemarkan kebersihan troli-troli berkenaan.
46. PR-1333-L70330
Tuan Wong Chen [Kelana Jaya] minta **MENTERI KESEJAHTERAAN BANDAR, PERUMAHAN DAN KERAJAAN TEMPATAN** menyatakan sama ada kebakaran yang telah berlaku di Ibu Pejabat Bukit Aman pada 28 Julai 2015 dikelaskan sebagai *arson* atau kebakaran kemalangan.
47. PR-1333-L70212
Dato' Ngeh Koo Ham [Beruas] minta **MENTERI KEWANGAN** menyatakan senarai apa perkara-perkara yang hendak dilaksanakan dengan wang yang dikutip daripada cukai GST.
48. PR-1333-L70661
Tuan Tony Pua Kiam Wee [Petaling Jaya Utara] minta **MENTERI KEWANGAN** menyatakan sebab syarikat 1MDB dan SRC International Sdn. Bhd. masih belum memfailkan Laporan Kewangan untuk Mac 2015 dan bilakah laporan-laporan tersebut akan difailkan. Adakah syarikat audit Deloitte telah memulakan kerja-kerja pengauditan.
49. PR-1333-L70346
Tuan Gooi Hsiao-Leung [Alor Setar] minta **MENTERI PENGANGKUTAN** menyatakan apakah tindakan yang akan diambil untuk membawa mereka yang bertanggungjawab menembak jatuh MH17 ke muka pengadilan setelah laporan "*Dutch Safety Board*"• diterbitkan pada 13 Oktober 2015 atas sebab-sebab kemalangan kapal terbang Malaysia Airlines MH17.
50. PR-1333-L70257
Tuan M. Kulasegaran [Ipoh Barat] minta **MENTERI SUMBER MANUSIA** menyatakan :-
- (a) sama ada pampasan PERKESO akan disemak semula dan dipertingkatkan lagi. Jika tidak, kenapa ; dan
 - (b) nyatakan jenis-jenis perlindungan terhadap pekerja-pekerja yang tidak tertakluk di bawah perlindungan PERKESO.

51. PR-1333-L69752

Tuan Charles Anthony Santiago [Klang] minta **MENTERI SUMBER ASLI DAN ALAM SEKITAR** menyatakan status penggubalan undang-undang untuk meningkatkan denda bagi pembakaran terbuka. Dapatkah Kementerian memberikan garis masa bagi saluran wang sebanyak RM8 juta bagi tujuan pembinaan "*check dam*" di kawasan Johan Setia, Klang.

52. PR-1333-L70910

Puan Kasthuriraani a/p Patto [Batu Kawan] minta **PERDANA MENTERI** menyatakan penjelasan berhubung status peruntukan pembangunan RM1juta di bawah ICU bagi semua Ahli Parlimen daripada pihak pembangkang dari tahun 2008 sehingga 2015, garis panduan permohonan serta prosedur memohon peruntukan tersebut.

53. PR-1333-L71293

Tuan Mohamed Azmin bin Ali [Gombak] minta **MENTERI KEWANGAN** menyatakan apakah Pelan Rancangan 12 Perkara yang dilaksanakan oleh Khazanah melalui suntikan dana sebanyak RM6 bilion demi menyelamatkan Syarikat Penerbangan Malaysia Airlines (MAS).

54. PR-1333-L70592

Tuan Liew Chin Tong [Kluang] minta **MENTERI DALAM NEGERI** menyatakan statistik kemalangan jalan raya dari tahun 2005 hingga 2015 termasuk maut, cedera parah dan cedera ringan mengikut kategori jalan persekutuan, jalan negeri serta lebuh raya.

55. PR-1333-L70461

Tuan Ng Wei Aik [Tanjong] minta **PERDANA MENTERI** menyatakan sama ada terdapat risiko yang beliau mungkin akan mengalami masalah untuk keluar negara sekiranya terdapat lebih banyak negara yang menjalankan siasatan terhadap skandal 1MDB. Sila nyatakan negara-negara yang tidak boleh dikunjungi oleh Perdana Menteri sekiranya ada.

56. PR-1333-L71057

Tuan Teo Kok Seong [Rasah] minta **PERDANA MENTERI** menyatakan :-

- (a) mengapakah RM2.6 bilion yang dimasukkan ke dalam akaun peribadi Perdana Menteri dianggap sebagai derma politik tetapi bukan rasuah; dan
- (b) bagaimanakah pihak penguat kuasa dapat mengenal pasti RM2.6 bilion itu bukan rasuah.

57. PR-1333-L70362

Tuan Wong Tien Fatt @ Wong Nyuk Foh [Sandakan] minta **MENTERI KESEJAHTERAAN BANDAR, PERUMAHAN DAN KERAJAAN TEMPATAN** menyatakan apakah status inisiatif skim perumahan sewa-beli yang mula dilaksanakan di sekitar Kuala Lumpur untuk membantu golongan miskin dan miskin tegar untuk memperoleh rumah. Adakah skim ini diwujudkan di negeri Sabah dan apakah rancangannya di Sabah.

58. PR-1333-L69722

Dato' Haji Mohd Zaim bin Abu Hasan [Parit] minta **MENTERI PERTAHANAN** menyatakan bilangan kem-kem tentera khususnya rumah keluarga anggota ATM yang rosak dan perlu dinaik taraf serta kos yang perlu ditanggung.

ATURAN URUSAN MESYUARAT DAN USUL-USUL

1. (D.R. 24/2015) Rang Undang-undang Profesion Kesihatan Bersekutu 2015
- **Menyambung semula Perbahasan atas masalah, “Bahawa Rang Undang-undang ini dibacakan kali yang kedua sekarang” (19 Oktober 2015)**

[Menteri Kesihatan]
2. (D.R. 27/2015) Rang Undang-undang Kumpulan Wang Simpanan Pekerja (Pindaan) 2015. **Bacaan Kali Yang Kedua**

[Menteri Kewangan]
3. (D.R. 28/2015) Rang Undang-undang Perbadanan Insurans Deposit Malaysia (Pindaan) 2015. “

[Menteri Kewangan]
4. (D.R. 30/2015) Rang Undang-undang Syarikat 2015 “

[Menteri Perdagangan Dalam Negeri, Koperasi dan Kepenggunaan]
5. (D.R. 29/2015) Rang Undang-undang Skim Kepentingan 2015. “

[Menteri Perdagangan Dalam Negeri, Koperasi dan Kepenggunaan]
6. (D.R. 9/2015) Rang Undang-undang Kanun Tatacara Jenayah (Pindaan) 2015 “

[Menteri Dalam Negeri]
7. (D.R. 12/2015) Rang Undang-undang Keterangan (Pindaan) 2015 “

[Menteri di Jabatan Perdana Menteri]
8. (D.R. 24/2014) Rang Undang-undang Dadah Berbahaya (Pindaan) (No. 2) 2014 “

[Menteri Kesihatan]

9. PR-1333-U69963

Datuk Dr. Makin @ Marcus Mojigoh [Putatan] akan mencadangkan:-

“Bahawa Dewan ini mengambil maklum bahawa sejak akhir-akhir ini, dan Gerakan Sabah-Sarawak keluar Malaysia (SSKM) kian mendapat perhatian dan sokongan dari sebilangan kecil rakyat dari kedua-dua negeri ini.

Bahawa Dewan ini mengambil maklum bahawa, terdapat rungutan-rungutan di kalangan rakyat negeri Sabah dan Sarawak dalam beberapa isu yang mereka fikirkan bahawa hak mereka, seperti yang dijanjikan dan terkandung dalam Perjanjian Malaysia 1963 telah dicabuli atau tidak ditunaikan. Dan mengambil maklum juga, antara isu utama yang disuarakan dalam rungutan ini adalah banjir pendatang asing ke negeri Sabah dan di tambah buruk pula dengan pemberian status warga Negara kepada mereka ini. Dan mengambil maklum juga bahawa, setiap kali isu 20 perkara (bagi Negeri Sabah) dan 16 perkara (bagi Negeri Sarawak) dalam Perjanjian Malaysia ini disuarakan, terdapat usaha-usaha pihak tertentu untuk mensenyapkan isu ini dan akhirnya rungutan-rungutan ini menjadi satu gerakan ketidakpuasan hati rakyat. Dan mengambil maklum juga bahawa, gerakan ketidakpuasan hati rakyat ini telah sampai satu tahap di mana mereka secara terbuka mengelarkan diri mereka sebagai aktivis Sabah-Sarawak keluar Malaysia atau ringkasnya SSKM. Dalam hal ini, Kerajaan hendaklah memandang serius akan kesan dan implikasi perpaduan rakyat serta ketenteraman negara pada keseluruhannya. Kita maklum bahawa, mengambil tindakan Undang-undang semata-mata untuk menghalang mereka ini bagi menyuarakan rungutan mereka ini tidak akan menyelesaikan isu yang ditimbulkan, malah akan merumitkan keadaan lagi di mana mereka akan semakin mendapat simpati daripada kalangan rakyat yang lainnya sementara Kerajaan pula dianggap sebagai tidak perihatin dan kuku besi. Maka, bagi menangani masalah isu ini, Dewan ini hendaklah mengambil ketetapan bahawa Kerajaan hendaklah merangka satu gerak kerja untuk menangani isu ini secara Holistik termasuklah menjemput dan mendengar rungutan mereka yang mengelarkan diri mereka sebagai SSKM ini.”

[Menteri Dalam Negeri]

10. PR-1333-U69964

Datuk Dr. Makin @ Marcus Mojigoh [Putatan] akan mencadangkan:-

“Bahawa Dewan ini mengambil maklum bahawa, terdapat rungutan-rungutan di kalangan rakyat bahawa sejak akhir-akhir ini, perpaduan, keharmonian, kesejahteraan dan kerjasama antara rakyat negara ini yang terdiri dari berbilang kaum dan agama telah terhakis. Dan mengambil maklum juga, antara isu utama menyebabkan perkara ini berlaku kerana terdapat golongan tertentu yang memainkan isu bangsa dan agama sewenang-wenangnya serta rakyat merasakan tidak ada tindakan tegas yang diambil bagi menangani masalah ini. Dan mengambil maklum juga bahawa, Perhimpunan Bersih 4 dan Perhimpunan Rakyat Bersatu baru-baru ini telah menanamkan bibit kebencian serta syak wasangka antara kaum di negara ini. Dan mengambil maklum juga bahawa, Rukun Negara sebagai tonggak perpaduan, keharmonian, kesejahteraan dan kerjasama antara rakyat negara ini secara tidak langsung tidak lagi dihormati dan dipatuhi. Dalam hal ini, Kerajaan hendaklah memandang serius akan kesan dan implikasi perpaduan rakyat serta ketenteraman negara pada keseluruhannya. Maka, bagi menangani masalah isu ini, Dewan ini hendaklah mengambil ketetapan bahawa Kerajaan hendaklah merangka satu gerak kerja untuk menangani isu ini secara Holistik termasuklah menjemput dan mendengar rungutan mereka ini.

Kerajaan juga hendaklah menguatkuasakan segala peruntukan Undang-undang yang ada bagi menghalang mana-mana demokrasi atau perjumpaan umum yang membangkitkan isu bangsa dan agama, yang boleh menggugat perpaduan, keharmonian, kesejahteraan dan kerjasama antara rakyat negara ini."

[Perdana Menteri]

11. PR-1333-U69965

Datuk Dr. Makin @ Marcus Mojigoh [Putatan] akan mencadangkan:-

"Bahawa Dewan ini mengambil maklum bahawa, terdapat laporan mengatakan bahawa operasi bot lautan dalam yang beroperasi di negara ini tidak mendatangkan faedah kepada negara ini secara total. Dan mengambil maklum juga, antara isu utama yang disuarakan dalam laporan ini adalah, para pengusaha bot lautan dalam ini menjual minyak diesel bersubsidi kepada bot-bot asing. Dan mengambil maklum bahawa, terdapat juga laporan bahawa tangkapan bot lautan dalam ini dijual kepada nelayan asing yang menawarkan harga yang lebih baik. Dan mengambil maklum juga bahawa, kedua-dua aktiviti yang disebutkan ini telah mendatangkan kerugian yang besar kepada negara ini, sama ada dari segi subsidi diesel mahupun dari segi tangkapan hasil lautan di negara ini dijual ke negara asing. Maka, bagi menangani masalah isu ini, Dewan ini hendaklah mengambil ketetapan bahawa Kerajaan hendaklah merangka satu sistem kawalan yang bersepadu bagi memastikan bahawa semua diesel bersubsidi digunakan dengan niat asal serta tangkapan tersebut hendaklah dipasarkan di negara ini."

[Menteri Pertanian dan Industri Asas Tani]

12. PR-1333-U69966

Datuk Dr. Makin @ Marcus Mojigoh [Putatan] akan mencadangkan:-

"Bahawa Dewan ini mengambil maklum bahawa, isu 1MDB telah mencemarkan nama baik Kerajaan dan Negara Malaysia pada umumnya. Dan mengambil maklum juga, isu 1MDB telah sedikit sebanyak menghakis kepercayaan pelabur asing kepada Sistem Pelaburan di Negara ini. Dan mengambil maklum juga bahawa, isu 1MDB telah disensasikan melalui media sosial, media elektronik dan media asing dengan sewenang-wenangnya yang menggambarkan bahawa syarikat milik Kerajaan ini hampir muflis dan liabilitinya perlu ditanggung oleh Kerajaan. Dan mengambil maklum juga bahawa, hasil daripada kemuskilan ini, rakyat pada umumnya mempersoalkan cara kerja Kerajaan mentadbir 1MDB sehingga mengalami kerugian yang besar dan terpaksa menanggung liability 1MDB. Maka, bagi menangani masalah ini, Dewan Yang Mulia ini hendaklah mengambil ketetapan bahawa, Kerajaan hendaklah memperjelaskan secara terperinci mengenai model perniagaan 1MDB kepada umum agar satu gambaran yang telus dapat mereka perolehi serta mengembalikan kebolehpercayaan rakyat kepada Kerajaan masa kini."

[Menteri Kewangan]

13. PR-1333-U70485

Tuan Ng Wei Aik [Tanjong] akan mencadangkan:-

“Bahawa Dewan Rakyat ini mengambil ketetapan untuk mengutuk Perhimpunan Rakyat Bersatu yang diadakan pada 16 September 2015 yang sifatnya berbaur perkauman serta bertujuan mengapi-apikan sentimen perkauman, termasuk menuntut supaya sekolah-sekolah Cina ditutup, menggelar anggota-anggota polis yang bertugas sebagai “barua Cina”, cuba menimbulkan kekecohan di Jalan Petaling serta mempersoalkan keperluan “Little India” diwujudkan dan tindakan-tindakan yang sewajarnya harus diambil terhadap pihak penganjur dan pihak-pihak yang harus bertanggungjawab.”

[Menteri Dalam Negeri]

14. PR-1333-U70272

Tuan M. Kulasegaran [Ipoh Barat] akan mencadangkan:-

“Bahawa Dewan ini mengambil maklum demi kepentingan negara dan masyarakat sejagat pandangan serius terhadap kestabilan ekonomi dan kemajuan negara harus diberi perhatian sepenuhnya. Oleh yang demikian Dewan ini perlu mengambil maklum mengenai perkara ini dan mengarahkan Kerajaan untuk mengatasi masalah ini.”

[Perdana Menteri]

15. PR-1333-U70255

Dr. Tan Seng Giaw [Kepong] akan mencadangkan:-

“Bahawa Menteri Kewangan membincangkan cara-cara yang diambil untuk mempertahankan nilai ringgit.”

[Menteri Kewangan]

16. PR-1333-U70256

Dr. Tan Seng Giaw [Kepong] akan mencadangkan:-

“Bahawa Menteri Sumber Asli dan Alam Sekitar mendebatkan masalah jerebu di rantau in.”

[Menteri Sumber Asli dan Alam Sekitar]

17. PR-1333-U71552

Tuan Fong Kui Lun [Bukit Bintang] akan mencadangkan:-

“Bahawa Kerajaan mempergiatkan usaha untuk menyatu padukan rakyat berbilang kaum di Malaysia yang kelihatan masih lemah dan longgar meskipun negara telah menjadi negara merdeka dan berdaulat sejak 58 tahun lalu supaya mereka boleh hidup dengan aman dan saling memerlukan dan memahami bagi memudahkan mereka membangunkan ekonomi negara secara bersama dan merealisasikan impian Malaysia.”

[Perdana Menteri]

18. PR-1333-U71553

Tuan Fong Kui Lun [Bukit Bintang] akan mencadangkan:-

“Bahawa Kerajaan memulihkan pilihan raya Kerajaan Tempatan seluruh negara supaya urus tadbir Kerajaan menjadi cekap, akauntabiliti dan bersih dengan mengambil langkah pertama untuk membuat kajian serius dan melakukan pungutan suara antara rakyat.”

[Menteri Kesejahteraan Bandar, Perumahan dan Kerajaan Tempatan]

19. PR-1333-U69805

Dato' Kamarudin bin Jaffar [Tumpat] akan mencadangkan:-

“Bahawa Dewan ini memutuskan untuk Malaysia menerima masuk, memberi perlindungan dan akhirnya memberikan taraf kewarganegaraan kepada 1000,000 orang rakyat negara Syria daripada jutaan orang yang sekarang menjadi pelarian di Turki dan Eropah.”

[Perdana Menteri]

20. PR-1333-U69806

Dato' Kamarudin bin Jaffar [Tumpat] akan mencadangkan:-

“Bahawa Dewan ini merakamkan perasaan sedih dan kecewa bahawa perjalanan kerja-kerja Jawatankuasa Kira-kira Wang Negara (PAC) telah tergendala oleh beberapa sebab dan dengan ini memutuskan untuk meminta Tuan Yang di Pertua Dewan Rakyat dengan segera melicinkan semula perjalanan Jawatankuasa itu.”

[Perdana Menteri]

21. PR-1333-U69807

Dato' Kamarudin bin Jaffar [Tumpat] akan mencadangkan:-

“Bahawa Dewan ini amat tidak berpuas hati dengan kemajuan pembinaan rumah-rumah untuk mangsa banjir negeri Kelantan. Oleh itu Dewan ini mendesak Kerajaan Pusat berusaha dengan lebih gigih lagi bersama dengan Kerajaan Negeri Kelantan untuk melipatgandakan usaha pembinaan rumah-rumah tersebut.”

[Perdana Menteri]

22. PR-1333-U70769

Dato' Johari bin Abdul [Sungai Petani] akan mencadangkan:-

“Bahawa Dewan ini mengambil maklum, hubungan antara kaum mutakhir ini makin meruncing dan jika tidak dibendung akan mencapai tahap amat merbahaya dan akibatnya negara akan hancur seperti yang terjadi di negara-negara lain yang sedang bergolak akibat isu perkauman. Bila rakyat Malaysia berbangsa Dayak, Kadazan, Orang Asal, Cina, Melayu, Jawa, Bugis atau apa suku kaum sekalipun mengkritik dan mempersoalkan hal tatakelola Negara dan kepimpinan Perdana Menteri dan Kabinetnya, rakyat tidak mempersoalkan ras Perdana Menteri. Rakyat mempersoal Perdana Menteri atas kapasiti beliau sebagai Ketua Eksekutif Negara. BERSIH 4.0 menganjurkan demo jalanan kerana mendesak Perdana Menteri memberi jawapan kepada banyak persoalan yang tidak terjawab. Soal 1MDB, Derma RM 2.6 bilion, Pertukaran Pegawai-pegawai SPRM, Penamatan khidmat Tan Sri Gani Patail sebagai Pendakwa Raya, pembebasan Abdul Razak Baginda yang rapat dengan Perdana Menteri dalam kes pembunuhan Altantuya Shaaribuu yang amat memalukan negara dan banyak lagi isu yang amat-amat mendesak yang tidak dijawab oleh Perdana Menteri secara meyakinkan. Untuk itu Kerajaan mesti membezakan mengkritik Perdana Menteri bukan mengkritik bangsa Perdana Menteri tetapi kerana Perdana Menteri adalah Ketua Eksekutif Negara yang sememangnya boleh dikritik yang dibenarkan oleh sistem pemerintahan yang diamalkan di negara ini.”

[Perdana Menteri]

23. PR-1333-U70770

Dato' Johari bin Abdul [Sungai Petani] akan mencadangkan:-

“Bahawa Dewan ini mengambil maklum, bila UMNO dan NGO yang menyokong UMNO menganjurkan demo jalanan bertemakan Himpunan Maruah Melayu pada 16 September 2015 yang kemarahan disasarkan kepada rakyat kaum Cina, yang dikatakan mendominasi Himpunan BERSIH 4.0 pada 29 dan 30 Ogos 2015, penganjur memilih kaum Cina sebagai fokus serangan. Penganjur membawa posters dan banners bertulis kata-kata provokasi dan perkauman yang amat merbahaya seperti “Ini Tanah Melayu, Cina boleh keluar”. “Bawa parang dan keris. Takut Cina. Umno perlukan anda”.

Sedangkan yang keluar dijalanan pada 29 dan 30 Ogos 2015 rakyat dari berbagai kaum termasuk Melayu dan Bumiputra yang lain. Kaum lain selain Cina juga menyuarakan perasaan tidak puas hati mereka terhadap Perdana Menteri. Di mana yang dikatakan Cina menghina Melayu dan Maruah Melayu dicabar. Kerajaan mesti berjiwa besar. Walaupun Kerajaan Barisan Nasional diterajui oleh UMNO dan Melayu tetapi rakyat negara ini terdiri dari berbagai bangsa yang wajib dilindungi dan dihormati.”

[Perdana Menteri]

24. PR-1333-U70772

Dato' Johari bin Abdul [Sungai Petani] akan mencadangkan:-

“Bahawa Dewan ini mengambil maklum, penyakit Denggi akibat jangkitan nyamuk di Malaysia telah mencapai satu tahap yang merbahaya. Lebih parah kematian akibat penyakit ini sudah diterima sebagai satu yang lumrah dan tidak ada rasa bersalah oleh pemerintah. Kerajaan sepatutnya menubuhkan satu institusi khas bagi melawan wabak ini dengan memberikan peruntukan kewangan yang secukupnya serta membekalkan berbagai pakar bagi menjadikan institusi ini betul-betul memberi tumpukan dan perhatian kepada masalah yang begitu lama tidak dapat diselesaikan. Malaysia mesti memainkan peranan utama dan boleh menjadi juara dalam memerangi penyakit ini bukan sahaja di rantau ini malah di dunia. Kerajaan mesti serius dan komited dalam hal ini.”

[Menteri Kesihatan]

25. PR-1333-U70774

Dato' Johari bin Abdul [Sungai Petani] akan mencadangkan:-

“Bahawa Dewan ini mengambil maklum, Kementerian Belia dan Sukan banyak memberi tumpuan kepada pembangunan sukan tetapi meninggalkan pembangunan belia di belakang. Setiap tahun ribuan anak-anak Malaysia yang keluar dari sekolah dan ramai yang tidak melanjutkan pelajaran ke pengajian tinggi atas berbagai sebab dan alasan. Akibat tidak ada program wajib yang mesti diikuti dan disertai oleh mereka, mereka menjadi satu eset yang amat bernilai yang terbiar dan tidak dimanfaatkan sepenuhnya. Adalah dicadangkan anak-anak ini, didaftarkan dan diwajibkan menyertai Khidmat negara selama dua tahun seperti yang dilakukan dikebanyakkan negara. Semasa dalam program ini, pilih dua atau tiga bidang ilmu yang boleh memberi menafaat berterusan bila mereka tamat program nanti. Sebagai contoh, ilmu motor mekanik dan elektrik. Selepas dua tahun mereka boleh berdikari dan bantuan susulan boleh diusahakan. Untuk memastikan program ini berjaya ianya mesti dilaksanakan sebagai program wajib dan dikembangkan dengan elemen ketenteraan.”

[Menteri Belia dan Sukan]

26. PR-1333-U70776

Dato' Johari bin Abdul [Sungai Petani] akan mencadangkan:-

“Bahawa Dewan ini mengambil maklum, kegiatan merempit oleh anak-anak muda khasnya anak Melayu amat memalukan bangsa dan Kerajaan. Kerajaan seolah-oleh tidak ada jawapan pada permasalahan ini. Mereka yang merempit bukan sahaja membahayakan nyawa mereka juga nyawa orang awam. Adalah dicadangkan pihak polis menggunakan anggota Cawangan Khas bagi meninjau dan kenal pasti ketua kumpulan ini dan menahan mereka atas undang-undang yang sedia ada. Penahanan mereka hendaklah dihebahkan dalam akhbar dan media elektronik. Menahan mereka untuk beberapa malam di lokap dan jika ada bukti yang cukup mendakwa mereka di mahkamah akan menghantar mesej yang jelas bahawa kegiatan mereka amat merbahaya dan amat dibenci oleh masyarakat. Ini mesti dilakukan secara konsisten bukan berkala.”

[Menteri Dalam Negeri]

27. PR-1333-U71195

Tuan Hee Loy Sian [Petaling Jaya Selatan] akan mencadangkan:-

“Bahawa Dewan ini mengemukakan Undi Tidak Percaya terhadap Perdana Menteri Datuk Seri Najib Tun Razak atas alasan penerimaan “Wang Derma” berjumlah RM2.6 billion yang pada mulanya dinafikan, kemudiannya mengugut untuk menyaman akhbar Wall Street Journal dan akhirnya mengakui wang tersebut diperolehi daripada individu yang berasal dari Timur Tengah. Dengan tidak menjelaskan mengapa “Wang Derma” ini dimasukkan ke akaun peribadi dan bukan atas nama parti, Dewan juga tidak berpuas hati ke atas siasatan skandal 1MDB yang berlaku di mana “Special Task Force” yang sepatutnya menyiasat skandal ini dibubarkan tanpa memberi sebarang alasan sehingga Peguam Negara Tan Sri Abdul Gani Patail ditamatkan perkhidmatan, pegawai SPRM dipindahkan, pihak polis mengganggu siasatan SPRM dan Bank Negara, Public Account Committee (PAC) yang sedang menjalankan siasatan terhadap kes 1MDB tidak berfungsi akibat daripada empat anggota PAC yang terbabit telah dilantik menjadi Menteri atau Timbalan Menteri oleh Perdana Menteri, Pengarah Cawangan Khas (SB) diberhentikan, Timbalan Pengarah Cawangan Khas dipindahkan ke Jabatan Perdana Menteri tanpa diberi tugas. Disebabkan masalah yang dinyatakan, Perdana Menteri Datuk Seri Najib Tun Razak telah menjejaskan imej Negara di dunia dan menyebabkan pelabur tidak yakin terhadap Kerajaan sekarang sehingga ekonomi menjadi tidak stabil, serta pasaran saham menjunam teruk dan kejatuhan nilai wang ringgit Malaysia berbanding dengan dolar Amerika Syarikat. Maka rakyat Malaysia tidak lagi percaya terhadap Perdana Menteri dan dengan ini Dewan hendaklah mengambil ketetapan untuk mengemukakan Undi Tidak Percaya terhadap Perdana Menteri.”

[Perdana Menteri]

28. PR-1333-U70806

Tuan Manivanan a/l Gowindasamy [Kapar] akan mencadangkan:-

“Bahawa Dewan ini mempertimbangkan cadangan untuk menghalang dan mengharamkan penjualan arak murahan (cheap liquor) secara mudah dan murah yang semakin berleluasa. Gegaja pengambilan arak murahan ini menimbulkan pelbagai masalah sosial seperti keganasan rumah tangga dan gengsterisme serta merosakkan organ dalaman. Di samping itu, kawalan dan penyeliaan terhadap kedai-kedai menjual arak perlu diketatkan. Masa penjualan arak dan lokasi minum arak perlu dikaji. Kawasan tempat awam seperti di taman awam dan taman permainan kanak-kanak, minum arak wajib diharamkan. Dewan ini juga wajib mempertimbangkan penubuhan Pusat Pemulihan Arak (PPA) di setiap negeri di Malaysia untuk membendung masalah minum arak yang semakin berleluasa di kalangan anak muda merentasi sempadan bangsa dan agama.”

[Menteri Kesejahteraan Bandar, Perumahan dan Kerajaan Tempatan]

29. PR-1333-U70808

Tuan Manivanan a/l Gowindasamy [Kapar] akan mencadangkan:-

“Bahawa Dewan ini mempertimbangkan cadangan untuk kes kematian di bawah tahanan Polis DiRaja Malaysia, keluarga si mati diberi kebenaran sepenuhnya untuk memperoleh Pakar Perubatan Forensik sendiri bagi mewakili pihak keluarga si mati semasa bedah siasat dijalankan.”

[Menteri Dalam Negeri]

30. PR-1333-U70809

Tuan Manivanan a/l Gowindasamy [Kapar] akan mencadangkan:-

“Bahawa Dewan ini mendesak agar pendidikan agama diperkenalkan di sekolah kepada pelajar bukan Islam sebagai langkah untuk menerapkan nilai-nilai murni dan keagamaan di kalangan pelajar bukan Islam bagi menangani gejala sosial yang kian meningkat dan berleluasa akibat daripada kegagalan sistem pendidikan di Malaysia.”

[Menteri Pendidikan]